

Quant fine Amours me proie que je chant

Linker 65,62; RS 306

Mss.: M 36, P 28 = Gace Brulé; C 112 = Robert de Dommant; K 45, Me, N 11, X 31 = Roi de Navarre; O 107, U 60, V 23, za 141 = anonimo.

Metrica: a10 b10 a10 b10 b10 a10 a10 (MW 852,1). *Chanson* di 5 *coblas unissonans* di 7 versi, seguite da 2 *tornadas* di 3.

Edizioni: Petersen Dyggve 1951, p. 315.

- letto 673 volte

Edizioni

- letto 433 volte

Petersen Dyggve

I.

Quant fine Amours me proie que je chant,
chanter m'estuet, que je nel puis laissier,
quar je sui si en son commandement
qu'en moi n'a maiz desfense ne dangier.
Se la bele, cui je n'os maiz proier,
n'en a merci et pitiez ne l'en prent,
morir m'estuet amoureux en chantant.

II.

Morir m'estuet s'Amours le me consent,
quar sanz Amours ne me puet rienz aidier;
et quant de li vienent tuit mi tourment,
bien me devroit mes douleurs alegier.
Pour ce li proi qu'ele vueille essaier
s'ele a pooir vers celi qui j'aim tant,
par proiere ne par commandement.

III.

Tuit mi desir et tuit mi fin talent
viennent d'Amours, c'onques ne seu trichier,
ainz seu amer si esmereement,
douce dame, qui ja ne quier changier.
Des icel jour que vous seu acointier,
vous donai si cuer et cors et talent
que rienz fors vous ne me feroit joiant.

IV.

Quant si me sui affinez finement
en fine amour, qu'autre deduit ne quier
(ne fins amis ne doit vivre autrement,
maiz qu'il n'en puist partir ne esloignier),
se bien amer me puet avoir mestier,
j'avrai joie de vostre biau cors gent,
bele et bonne, de douz acointement.

V.

Se Diex me doint rienz que je li demant,
u mont n'a rienz qui tant face a proisier
con cele fait de qui ma chanson chant.
De grant valour et de bon pris entier
plus puet valoir c'on ne puist souhaidier.
Or me doint Diex amer et servir tant
qu'aie merci, quar merci vois querant.

VI.

Par Dieu, Gillés, bien me puis afichier
que j'aim del mont toute la melz vaillant,
la pluz courtoise et la pluz avenant.

VII.

Chansons, va t'en, garde ne te targier,
et di Noblet que cuers qui se repent
ne sent mie ce que li miens cuers sent.

- letto 327 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/quant-fine-amours-me-proie-que-je-chant>